

Tusarniaaneq: Qilalukkanik qaqortanik qernertanillu illersuineq piniarnerlu pillugit nalunaarummut missingiutip tusarniutigineqarnera.

Journalnr. 66.16

Tunuliaqutaq

Aalisarnermut piniarnermullu naalakkersuisoqarifup ulloq 02.05.2024 saqqummiuppaa tusarniaassutigalugu qilalukkanik qaqortanik qernertanillu illersuineq piniarnerlu pillugit nalunaarummut missingiut.

Maleruagassatigut tunngavissat

Piniarneq aallaaniarnerlu pillugit Inatsisartut inatsisaat nr. 34, 13. juuni 2023-meersoq.

Pissutsit atuuttut

Qilalukkanik qaqortanik qernertanillu illersuineq piniarnerlu pillugit Namminersorlutik Oqartussat nalunaarutaat nr. 3, 27. januar 2017-imeersoq maanna atuuppoq.

Qilalukkanik qaqortanik qernertanillu illersuineq piniarnerlu pillugit nalunaarummut nutaamut missingiut makkuninnga allannguutitaqarpoq:

- Piniarneq aallaaniarnermullu inatsisartut inatsisaat nutaap malitsigisaanik allannguutit.
- Qilalukkat qaqortat pillugit nunap assinganik ilanngussamik immikkoortumik ilisarititseqqiineq.
- Tunumi qilalukkanut qernertaqatigiinnut ilisimatuussutsikkut killeqarfiit nutaaqalernerata malitsigisaanik piniartarfiit nutaat.
- Kitaani qilalukkanut qaqortaqtigiinnut killeqarfiit nutaat.
- Piniarfik Ikeq (kingullermik Iita) kujammut killeqarfia allanngortinneqarpoq. Siorapaluk piniarfik Ikeq-mut ilanngunneqarpoq.
- Nassuiaatinik erseqqissaassuteqarneq.
- Qilalukkanik qaqortanik qernertanillu pissataqarnermi annaasaqarnermilu pisassiissutinik akuersissutinilluunniit ilanngaasoqartannginneq.
- Arnaviat piaqqallit eqqissisimatitaalerput.
- Akuersissutit elektroniskimik takutinneqarsinnaalerput.
- Silut pillugit erseqqissaaneq.
- Pisassiissutinut atatillugu kommunalbestyrelsip suliaasaanik erseqqissaaneq.
- Sunngiffimmi pinialuttartut pisassaasa annertussusissaat Naalakkersuisuniit aalajangersarneqarsinnaanerata pillugu erseqqissaaneq.
- Pisaqarnermi akuersissuteqarnissamut piumasaqaatinik erseqqissaaneq.
- Kommunit ileqqoreqqusai pillugit immikkut immikkoortumik ilisarititsineq.
- Immikkut akuerineqarneq pillugu immikkoortoq itisilerneqarpoq.
- Pisat pillugit nalunaaruteqarnissamut immersugassaq nutaaq.
- GPS sumiiffik pisaqarnermi allanneqarnissaa pillugu piumasaqaat.
- Aaqqissuussinnermit teknikikkullu isikkulinnit allanngortitsinerit.

Allaffeqarfik aalisartut piniartullu peqatigiiffiinnut tusarniaanerani akissuteqaatit ukua tiguneqarput: Sisimiuni aalisartut piniartullu peqatigiit(SAPP) akissuteqaatiminni 05.05.2024-meersumi imatut allapput:

§ 3 pillugu: qilalukkat qaqortat piaqqisartut (uiallit) piniaqqusaanissaat kissaatigaarput, Kitaanut pinerminni piaraat (uiaat) piniarneqarnissaminnut naammatsereertarmata.

§ 10 pillugu: Pisaqarnermi pisaqaqataasut atii kisimik allaqqassapput inuup normua pinnagu. Makku tunngavigalugit Inuup normuata atornerlunneqarsinnaanera.

§ pillugu 22: Angallatit tuniniaavittut atorneqarnissaat nunamilu kissaatigaarput. Makkuninnga tunngaveqarluta. Nalliuttuni kalaalimineerniarfiit sivisuumik matoqqasarput ilaatigullu arfininngorneq sapaallu ilanngullugit. Taamaasilluni neqit mattaallu asiusoornissaat aarlerinaateqarluni.

SAPP-p § 3 pillugu oqaaseqaataanut atatillugu Allaffeqarfimmiit Aalisarnermut piniarnermut naalakkersuisoqarfik(APN) apeqquteqaateqarfigaarput § 3-mi taamatut aalajangersagaliorniarnarup suna tunngavigineraa nassuiaatigeqqullugu.

APN 27.05.2024 mail-ikkut akissuteqarnerminni imatut allapput:

“Arferit allat taamannak inissisimapput. Qilalukkat mikisut piaqqat pisarineqartartut ikittuinnaat nalunaarutigineqartarmata qilalukkat aamma assigiimmik inissinniarlugit pilersaarutigivarput. Qilalukkat qernertat qaqortallu arnavissat piaqqallit pisarineqartartut ikittuaraapput, pisat ikittuinnaanernannut marlunnik peqquteqarsinnaapput: arnavissat piaqqallit pisarineqartartut ikipput, imaluunniit pisaqarnermi piaraq nalunaarutigineqarneq ajorpoq. Qernertat eqqarsaatigalugit nunarput tamakkerlugu ilisimatuussutsikkut inassuteqaatit apparaluttuinnarnerat eqqarsaatigisariaqatsigit”.

SAPP-p § 10 pillugu akissuteqaataanut Allaffeqarfiup erseqqissaatigissavaa tusarniaassummi § 10-mi piumasaqaataanngimmat akuersissutini inuup normui allanneqarnissaat taamaallaat § 10, imm. 3-mi allaqqavoq piniarnermi peqataasut aqqi inuuviilu allanneqassasut. Inuup normui allanneqarnissat piumasaqaataanani. Taamaattoq Allaffeqarfiup maluginiarpaa tusarniaassummi § 10, imm. 3 kalaallisuuani qallunaatuuanilu allaqqasut assigiinngimmata. Qallunaatuuani taamaallaat allaqqavoq peqataasut **aqqi** akuersissummi allaqqassasut. Kalaallisuuani allaqqalluni peqataasut **aqqi inuuviilu** akuersissummi allaqqassasut.

SAPP-p § 22 pillugu oqaaseqaataanut tungatillugu APN-ip mail-ikkut allalutik erseqqissaatigivaat Nalunaarummi tunisineq (indhandling) aamma tuniniaaneq (salg) immikkoortinneqarmata, tuniniaanermi allaqqanngilaq angallammiit tuniniaaqqusaanngitsut. Eqqumaffigineqassaarli Nersutit Nakorsa qarfianiit piumasaqaatinik naammassinninnissamut malittarisassat tassanngaaniit pissarsiarineqassammata uumasut@nanog.gl-mut allalluni. Taakku saaffigineqartassapput tuniniaanissamut piumasaqaatit pillugit”.

Qullersaqarfiup oqaaseqaatai

Allaffeqarfiup naliliinera:

Allaffeqarfiup nalilerpaa qilalukkanik qernertanik qaqortanillu pisassiisarnermi massakkut Nalunaarummi atuuttumi aalajangersakkat, tassunga ilanngullugu Naalakkersuisut pisassiissutit aalajangiiffiginnginneranni kommunit tusarniaqqaartarnissaannik aalajangersakkat uani nutaassami allanngortinniarneqanngitsut. Pisassiisarnermi Naalakkersuisut kommunillu akornanni pisussaaffiit allanguuteqassanngitsut Allaffeqarfiup nalilerpaa.

Taamatullu aamma qilalukkanik piniarnermut Kommunit sutigut ileqqoreqqusaliorsinnaanerannik aalajangersakkat allannguteqassanngitsut Allaffeqarfiup nalilerpaa.

Taamaattoq oqaatigineqarsinnaavoq ukiuni arlaqalersuni piniartuniit ujartorneqartarmat qilalukkanik piniarnermi (piniarnertaviani) umiatsiaaqqaat angallatillu amerlasuut piniaqatigiinneranni ulorianartorsiornerit pisarmata aallaasit piniutitut atorneqarneranni inuunermik ulorianartorsionerit pininnaasarlutik pisarlutillu. Piniarnertaviani ulorianartorsiorsinnaanerit pinngitsoorniarlugit imaluunniit annikillisarniarlugit inatsisitigut sukaterisoqarnissaa piniartunit kissaatigineqartarluni. Ajornartorsiut taanna kommuninut ataasiakkaanut tunngaannanngimmat

tamanulli atuummat Allaffeqarfiup nalilerpaa tassuuna sukaterisoqarsinnaappat Sineriammi tamanut assigiimmik atuuttussamik Nalunaarummi erseqqissumik aalajangersaasoqartariaqartoq. Allaffeqarfiup nalilerpaa ajornartorsiut taanna Nalunaarummi maleruaqqusaliunneqarpat naleqqunnerusoq Allaffeqarfiup nalilermagu ajornartorsiutip kommuninut ataasiakkaanut ileqqoreqqusaliornikkut tunniunneqaannarnissaa naleqqutinngitsoq.

Allaffeqarfiup nalilerpaa tusarniaanermut SAPP-p oqaaseqaatai Naalakkersuisoqarfimmit akissuteqarfigineqartut akissuteqaatit tunngavigalugit Ataatsimiititaliamit isummerfigineqarsinnaasut.

Allaqqafiup nalilerpaa qilalukkanik pisaqarsimatilluni pisanik nalunaaruteqartussatitaaneq naammassinagu, tassa pisat kommunimut nalunaarutigineqartut, neqinik mattannillu tuniniaasarneq, pingaartumik facebook-mi, unioqqutitsinerusoq piniarnermut nakkutilliisoqarfimmit iliuuseqarnikkut nakkutigineqarnerusariaqartoq, tamannalu nakkutilliinerunissaq Nalunaarutissami erseqqissumik aalajangersaaffigineqartariaqartoq. Allaffeqarfiup nalilerpaa pisanik nalunaarutigineqanngitsunik unioqqutitsilluni tuniniaasarneq takussaasoq iliuuseqarfigineqanngippallaartoq.

Innersuussut

Allaffeqarfiup innersuuppaa tusarniaanermut nalunaarutigineqartut aammalu pissutsit aallaavigalugit oqariartutiginetartut nalilersuinerillu, Qeqqata Kommunian sinnerlugu, siulittaasup aaliangiiffigalugulu akuerissagaa.

Siulittaasup aalajangiinera:

Aalisarnermut, piniarnermut nunaqarfiillu pillugit Ataatsimiititaliamini siulittaasup Qeqqata Kommunian sinnerlugu atuisut tusarniaaffigereerlugit maj-ip 30-ani 2024 aalajangiivoq, allaffeqarfiup qilalukkat pillugit tusarniaanermut nalilersuutai Naalakkersuisoqarfimmut akuerilugit atsiussalluni.



Aqqu Skifte
Siulittaasoq
Maj-ip 30-ani 2024

Ilanngussaq

1. Aalisarnermut piniarnermullu naalakkersuisoqarfip ulloq 02.05.2024 saqqummiuppaa tusarniaassutigalugu qilalukkanik qaortanik qernertanillu illersuineq piniarnerlu pillugit nalunaarummut missingiut.
2. Ilanngussaq 2: Qilalukkat qernertanut piniarfiit killeqarfiinut nassuiaatit
3. Ilanngussaq 3: Qilalukkat qaortanut piniarfiit killeqarfiinut nassuiaatit
4. SAPP-p tusarniaanermut akissuteqaataa 05.05.2024-meersoq

